

S. JOSÉ

LECTIO BA PREADOLEXENTE / ADOLEXENTE

INTRODUSAUN

Iha Liturjia, bainhira ko'alia kona-ba Tempu "Ordináriu", hanoin ba Tempu iha ne'ebé la reflete kona-ba salvasaun nian mistériu partikulár ida, maibé hanoin katak tempu hotu, momentu hotu sai momentu ne'ebé maromak uza atu soi ita.

Tan ne'e, ita sei reflete kona-ba ema ida ne'ebé la halo buat extraordinariu ida, maibé ho ninia prezensa, halo Maromak Nia oan sai boot iha ita-nia mundu.



Molok hahú, ita sei husu **Espíritu Santu** nia tulun atu ita bele lee no komprende pasajen ida ne'e tuir Maromak nia hanoin. (bele hili knananuk ida ka orasaun ida)

LECTIO

Iha Biblia la iha pasajen barak kona-ba s. José, dala ruma evanjelista sira temi ninia naran, maibé se ita buka buat ruma importante liu, ita bele sura akontesimentu ne'ebé kona ninia moris ho liman-fuan sira husi liman ida de'it.

Buat barak ne'ebé sarani sira dehan kona-ba S. José, husi Tradisaun Kreda nian, no husi esperiênsia sarani dahuluk nian. Entre pasajen 5 ne'ebé hatudu José nia prezensa, ita sei hili s. José nia mehi bainhira nia atu kaben ho Maria. Tuir hebreu sira nia cultura, biblista sira hanoin katak iha momento ne'ebé anju mosu ba José, nia tinan karik 17 ka 18. Iha tradisaun ida ne'ebé dehan katak José mak faluk bainhira kaben ho Maria no nia iha ona oan ruma ne'ebé boot. Maibé iha evanjellu la iha buat ida kona-ba aspetu hirak ne'e, nune'e ita sei considera S. José nu'udar mane klosan ida.

José husu nanis ona atu kaben ho Maria

Se José husu de'it atu kaben ho Maria, ne'e katak nia seidauk iha empeñu ho nia?

Iha kultura hebreu sira nian, bainhira mane ida ba husu ba nia doben nia família atu kaben, sira sei noivu/a, maibé tuir lei, maski sira seidauk hela hamutuk, no noiva kontinua hela ho ninia família, sira hanesan ema ne'ebé kaben ona, tanba mane fó ona feto nia folin.

Molok sira moris hamutuk, Maria ko'us tiha ona hodi Espiritu Santu nia kbiit.

Iha kultura hebreu sira nian, oinsá considera feto ne'ebé ko'us molok kaben?

Hanesan foin dehan, maski seidauk hela hamutuk, feto no mane mak feen no laen ona. Tuir tradisaun no familia sira nia hakarak, sira hein atu hetan oan bainhira sira hela hamutuk, maibé laiha "impedimentu", kona-ba buat ne'e. Nune'e, ema sira la hakfodak bainhira sira rona katak noiva ida ko'us ona. Problema mosu ba José, tanba nia hatene katak labarik ida ne'e la'ós ninian.

José, ne'ebé ema di'ak

Katak sa di'ak?

Lian tetun tradúz "di'ak", maibé liafuan loloos mak "justu". Ba hebreu sira liafuan "justu" la dehan de'it ema ida ne'ebé laran maus, hakmatek, maibé liuliu refere ba salmu I, iha ne'ebé dehan katak ema loos hanesan ai-hun ida ne'ebé tau abut iha Maromak nia Futar Lia no Maromak nia hakaran mak ninia ksolok. Tan ne'e, ema justu mak ida ne'ebé halo diálogo ho Maromak nafatin no hola dezisaun tuir Maromak nia lei eh hakaran.

José lakohi hamoe Maria... Nia hanoin dau-daun buat ne'e

Se dehan katak la iha problema atu ko'us molok moris hamutuk, tansá José lakohi hamoe Maria?

Bainhira mane ida rekoñese katak ninia noiva ko'us, maibé oan ida ne'e la'ós ninian, feto sei simu kastigu hanesan feto ne'ebé kaben ona, katak kastigu ba adulteriu. Se imi sei hanoin buat ne'ebé mosu ba Jezús bainhira fariseu sira lori ba Nia, feto ida ne'ebé halo sala, kastigu ba adulteriu atu tuda mate feto ida ne'e. José hadomi Maria, nune'e iha momento ida ne'e, nia ne'ebé justu, buka dalan atu bele tau hamutuk domin no fidelidade ba Maromak nia Lei. José la simu noticia ida ne'e ho hirus ka vingansa, maibé nia haka'as an atu buka Maromak nia hakaran iha akontesimentu ida ne'e.

Ema ida impresta osan ba ema na'in rua

Jezús hakarak hato'o sa loos ho aiknanoi ida ne'e?

Bainbain Jezús gusta haktuir aiknanoi sira tanba fasil liu ba ema atu komprende mensajen ida se envolve iha istória ida ka rona buat ruma ne'ebé kona ninia moris loronloron nian. Aiknanoi ida ne'e haktuir katak ema na'in rua ne'e iha tusan hotu, nune'e mansajen uluk liu ne'ebé Jezús hakarak hato'o ba Simão katak ema hotu, iha Maromak nia oin, mak ema sala na'in. Ho ninia liafuan, Simão hatudu katak nia hanoin ke nia mak loos no feto ida ne'ebé mak aat, maibé Jezús troka kedas hanoin ida ne'e: ema hotu mak ema maksalak, balun iha sala boot ka todan, balun iha sala ki'ik, maibé laiha ida ne'ebé sala laek (se ita la considera Maria).

"Na'i nia anju mosu ba nia iha mehi.

Se José mehi, oinsá ita bele fiar katak anju ida ne'e mosu duni?

Iha Biblia tomak, liuliu iha Testamentu Tuan, temi "mehi" atu dehan katak Maromak hatudu An ba ema ida. Maibé bainbain Maromak mosu hanesan ne'e ba ema sira ne'ebé iha relasaun particular ho Nia, iha sensibilidade maka'as ba Maromak nia dalan sira. Dala ida tan, evangelista Mateus hakarak halo ita komprende katak iha ninia moris tomak, José moris nu'udar ema fiar-na'in ida.

Keta ta'uk.

Tansá José tenke ta'uk, karik anju hakarak dehan "moe"?

Lae, ba ema ida ne'ebé iha sensibilidade ba Maromak nia mistériu, simu konvite atu hola parte ba mistériu ida ne'e bele halo ema ta'uk, katak nia la hatene se nia bele hatán loloos ba buat ne'ebé Maromak husu ba nia. Anju Gabriel uza liafuan ida ne'e ba Maria ho signifikadu hanesan: Maromak bolu nia (Maria no José) atu kolabora iha Ninia planu salvasaun nian no sira la bele ta'uk katak planu ida ne'e mak boot liu fali sira-nia kapasidade.

Maria sei tuur ahi oan mane ida ne'ebé ó sei hanaran Jezús.

Tansá José tenke fó nia naran?

Iha hebreu sira nia lei, bainhira mane ida fó naran ba labarik dehan katak nia iha kbiit hasoru labarik ida ne'e, no mós estadu rekoñese nia nu'udar aman legal ho direitu hotu. Iha ema hotu nia oin, José mak Jezús nia aman no nia simu "misaun" atu tau matan, atu akompaña Maromak nia Oan iha ninia moris hodi tulun Nia atu sai boot tuir Maromak nia hakaran.

Hader tiha husi mehi, José halo tuir buat ne'ebé Na'i nia anju haruka.

José la hatán buat ida ba anju?

Iha evanjellu hotu, José la ko'alia liu, ita la hatene nia lia oinsá. Iha ne'e, iha momento ne'ebé anju haruka nia atu hala'i ba Ejiptu ho Jezús no Maria, José hader tiha, halo tuir kedas buat ne'ebé anju haruka. Nia la halo komentariu ida, la hanoin ba ninia an rasik, saida mak nia lakon, José nia preokupasaun mak tuir de'it buat ne'ebé Maromak hakarak.

**MEDITATIO**

Ita koko atu haree fila fali testu ida ne'e, hodi husu ba ha'u-nia an rasik oinsá ha'u bele banati tuir José nia esperiênsia, maski nia tinan boot liu fali ha'u nian, iha familia, iha fatin iha ne'ebé hela ba, iha sociedade no Kreda.

- Depois de funu mundial daruak, hebreu sira iha Jerusalem, loke jardín ida ne'ebé hanaran "Ema justu sira nia jardín", iha ne'ebé kuda ai ida ba ema ida ne'ebé moris nu'udar "justu", hodi buka nafatin Maromak nia hakaran no respeita ema seluk nu'udar Maromak nia oan sira. Iha ha'u-nia moris, ha'u mós iha possibilidade atu moris nu'udar "ema justu", hodi iha relasaun kle'an ho Maromak, ko'alia ho Nia hanesan ho belun ida, buka atu tuir Ninia hakaran nafatin, maski karik ha'u bele "lakon" buat ruma, hateke ba ema seluk ho Jezús nia matan, hodi hadomi sira. Moris nune'e mak susar? Sa de'it mak impede ba ha'u atu moris nu'udar "ema justu"?
- José (hanesan Maria) loke nia laran ba Maromak nia projetu: atu bele hatene Maromak nia hakaran no ninia projetu ba ha'u-nia moris no ema seluk nian, presiza fó tempu ba Nia, presiza lee ninia Liafuan sira iha Biblia, presiza hatene Kreda nia tradisaun, presiza reza ho fuan tomak. Maromak mak importante iha ha'u-nia moris ka lae? Ha'u hatene fó tempu ba Nia ka Nia hanesan roda reserva nian... to'o bainhira hetan susar ne'ebé la resolve mak ha'u husu Maromak nia tulun, atu bele ajuda ha'u.
- José la ko'alia, maibé nia halo nafatin buat ne'ebé Maromak gosta. Iha ita-nia moris, dala barak, ita diskuti no ko'alia, ko'alia, ko'alia...
- to'o halo ema seluk kole atu rona ita! Ita temi justisa, igualidade, valór boot sira de'it, maibé iha ita-nia moris loron-loron nian, ita moris tuir ita-nia gostu no ita-nia hakarak. Oinsá ha'u bele hala'o valór sira ne'e iha ha'u-nia moris nu'udar preadolescente ka adolexente? Ha'u bele halo saida atu ha'u-nia hahalok la'o hamutuk ho ha'u-nia liafuan sira?
- José hala'o knaar ne'ebé Maromak entrega ba nia: akompaña Jezús iha nia moris nu'udar labarik no tulun Nia atu sai ema tasak; tan ne'e S. José hanorin servisu ida no tradisaun Israel nian ba Jezús. Dala barak Maromak hatudu Ninia prezensa iha ita-nia moris liuhusi ema sira ne'ebé tau matan ba ita ka eduka ita. Ha'u koko atu hanoin fali ba ema sira ne'ebé akompaña no gia ha'u-nia moris, no ha'u sei agradese ba sira-nia prezensa.

ORASAUN

Bazeia ba buat ne'ebé ó deskobre kona-ba S. José, koko atu hakerek orasaun ida ba nia, hodi entrega ba nia edukadór, aman-inan, mestre no sira hotu ne'ebé akompaña ó-nia moris to'o oras ne'e.

ATIVIDADE

Ita haree katak S. José mak ema nonok nian... dala barak ita uza liafuan sira ne'ebé fo'er ka folin laek. Iha fulan ida ne'e ha'u koko atu la tolok no atu la hatán ho liafuan kro'at ba ema sira ne'ebé sadik ka hasara ha'u; no mós ha'u sei reza ba sira nu'udar "vingansa"!